

元代文集
一五

元代史料叢刊編委會

主編

元
代
史料叢刊
續編

黃山書社

元代文集 一五

元代史料叢刊編委會 主編

元
代
史料叢刊
續編

黃山書社

(元) 閻復 撰

靜軒集五卷附錄一卷

藕香零拾本

靜軒集卷一

續

高

唐

閣

復

送尙書柴莊卿出使安南

柴侯身許國志意何深
瀄昆弟死絕域渥注雙玉麟
談笑萬里侯劍氣浚青雲
畏途走康莊異俗猶四鄰
至元淨遐荒包茅貢來臣
奈爾三不朝廢置良有因
鱗介易衣裳島夷主民兵
威儀不勝用仰輔吾仁君

遺山先生挽詩

蕭寺秋風卷玉荷月明人影共婆娑
誰知別後驪駒曲便是先生薤露歌
野史夜寒蟲蠹簡錦機春暖鳳停梭
祇因前日西州路常使羊曇忍淚過

廉平章挽詩

海岳儲精五十秋早聞仙馭躡金虬
梁公獨擅斗南譽

老范長懷天下憂東閣閉關蒼蘚合西山埋玉白雲稠
鳳池人物誰優劣合在元龍百尺樓

送李兩山再使安南

往年御節使荒遐風節堂堂眾所誇萬里朱厓鱗介地
一星銀漢斗牛槎轉輸已息江南郡烽燧還清瘴海涯
垂囊歸來見天子又搆恩詔撫皇華

梅杖

揀徧西湖萬玉柯春風入手重摩挲較量邛竹能香否
比並鳩藤奈白何聲破夢寒霜滿戶影隨詩瘦月橫波
只知功到調羹盡不道扶顛力更多

次子方參政劍池韻二首

闔閭千載古墳荒父老猶傳好劍王埋向古池終涌去
斫開頑石是誰將一峰鼈冠居平地千仞龍刳出大洋
咫尺蒼厓秘雷雨不愁枯旱救炎方

晴煙漠漠接邱荒
萬里春風屬帝王
吳主裂雲分峭壁
秦人勒馬問干將
樹根絡石懸敲岸
泉脈穿厓入大洋
可是高明題品後
一泓秋水啟迷方

元詩題
癸之乙

題干越亭送君石祕校詩後

南昌一尉老西都
文采風流接聖俞
詩好兒稱歐永叔
書工不減蔡君謨
洞庭鴈過風生羣
干越峰青斗戛湖
細讀粉箋當日詠
終篇無字不驅珠

宛陵集

元 代 文 集

元
史
料
續
編

第 一 五 册

靜軒集卷二

加封五嶽四瀆四海詔至元二年二月

朕惟名山大川國之秩祀今嶽瀆四海皆在封宇之內
民物阜康時惟神休而封號未加無以昭答靈貺可加
上東嶽為天齊大生仁聖帝南嶽司天大化昭聖帝西
嶽金天大利順聖帝北嶽安天大貞玄聖帝中嶽中天
大雷崇聖帝加封江瀆為廣源順濟王河瀆靈源弘濟
王淮瀆長源溥濟王濟瀆清源善濟王東海廣德靈會
王南海廣利靈孚王西海廣潤靈通王北海廣澤靈祐
王仍各遣官詣祠致告以稱朕敬恭神明之意文類卷九
建儲詔大德九年六月
惟我太祖聖武皇帝世祖聖德神功文武皇帝規模宏
遠預建儲嗣式與古合朕恪遵祖宗成憲允協昆弟僉

言立嫡子德壽爲皇太子茲有日矣比者遠近宗親復以爲請又中書百司及諸老臣請授冊寶昭示中外朕俯從眾願於今日五日授以皇太子寶所有冊禮其如常制屬茲盛舉宜布新恩於戲慶衍無疆既正名於國本仁同一視尙均福於黎元文類九

卽位詔

大德十一年五月

昔我太祖皇帝以武功定天下世祖皇帝以文德洽海內列聖相承丕衍無疆之祚朕自先朝肅將天威撫軍朔方殆將十年親御甲冑力戰卻敵者屢矣方諸蕃內附邊事以甯遠聞宮車晏駕適有宗室諸王貴戚元勳相與定策於和林咸以朕爲太祖曾孫之嫡裕皇正派之傳以功以賢宜膺大寶朕謙讓未遑至於再三還至上都宗親大臣復請於朕聞者姦臣乘隙謀爲不軌賴祖宗之靈母弟愛育黎拔力八達稟命太后舉行天罰

內難既平神器不可久虛宗祧不可乏祀合辭勸進誠
意益堅朕勉徇輿情於五月二十一日卽皇帝位任大
守重若涉淵冰屬嗣服之云初其與民而更始於戲不
承丕顯敢忘持守之心于蕃于宣勉效忠勤之力共隄

新政聿底隆平

文類九

皇太子冊文

皇帝若曰祖宗聖緒恭承丕顯之謨兄弟懿親宜正元
良之號立天下之大本示天下以至公咨爾皇太子仁
名德器淵深英姿玉粹武奮清宮之禕績文參定策之
殊勳豈特華萼交輝之情式相好矣其在鳧鷖守成之
治須爾贊之故於連氣同枝之間付以監國撫軍之任
茲上承於母意蓋允出於朕心已於六月朔旦而授爾
皇太子金寶今復遣攝太尉丞相塔思不花持節授爾
玉冊維寵命之薦膺尙謙恭而自牧益盡甫親之孝益

勤事上之忠以敦九族內睦之風以衍億祀無疆之慶

文類

加封孔子制大德十一年九月

蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也朕纂承丕緒敬仰休風循治古之良規舉追封之盛典加號大成至聖文宣王遣使闕里祀以太牢於歲父子之親君臣之義永惟聖教之尊天地之大日月之明奚禱名言之妙尙資神化祚我皇元文類

追封伯夷叔齊制

蓋聞古者伯夷叔齊逃孤竹之封甘首陽之餓讓爵以明長幼之序諫伐以嚴君臣之分可謂行義以達道殺身以成仁者昔居北海之濱遺廟東山之上休光垂乎千載餘澤被於一方永懷孤峻之風庸示褒崇之典於

戲去宗國而辭周粟曾是列爵之可糜揚義烈以激清
塵期於世教之有補可追封伯夷爲昭義清惠公叔齊
崇讓仁惠公文類十一

丞相伯顏贈諡制

天下大統不嗜殺則一之聖主弘功蓋必資於賢者昔
在至元之際方隆混一之期有來命世之奇材懋建殊
常之偉績故太傅開府儀同三司錄軍國軍事伯顏崆
峒孕秀列象騰精居政府則不動聲氣措泰山之安秉
戎律則純乎仁義猶時雨之降當其聲鶴浦渝盟之罪
總龍驤飛渡之師克廣世祖好生之心允獲宋人誠服
之意衣冠不改市肆不易恩威普洽於三吳車書以混
文軌以同聲教遂覃於百粵逮朕纂承之始益申推戴
之誠永懷社稷之宗臣宜侈山河之高爵於戲曹侍中
江南之役規摹一何小哉郭汾陽異姓而王崇報斯亦

至矣可贈宣忠佐命開濟功臣太師開府儀同三司追
封淮安王諡忠武文類十一

丞相阿朮贈諡制

邊外開邊四達弗庭之域將門出將三持分閫之權緬
思百戰之勞宜用九原之賁故光祿大夫中書左丞相
兼都元帥贈開府儀同三司太尉追封并國公諡武宣
阿朮英才開世勇略邁倫當先皇大理之征佐乃父雲
南之役靖蠻方而平交趾拔襄漢而下江南薦瘴揮戈
萬里若衽席之上龍驤飛渡三吳歸掌握之中贊成混
一之圖式副元勳之號按禮寺易名之典加王章異等
之恩於戲青史屢書諒騰芳之有永黃河如帶尚流慶
於無疆可加贈推誠宣力保大功臣太尉開府儀同三
司上柱國追封河南郡王諡武定文類十一

丞相線真贈諡制

蕭曹翊漢素非閥閱之家房杜匡唐卒乏鈞衡之副眷
先朝之碩輔絲累世之芳猷永懷弼亮之賢庸示褒崇
之禮太傅錄軍國重事開府儀同三司中書右丞相監
修國史完澤之父故光祿大夫中書右丞相宣徽使線
真稟靈河嶽著象星辰應明良千載之期萃忠孝一門
之慶梯天力競元戎奠鷄首之郊扶日功高奕葉應龍
飛之運惟昔中書之草創歷陳治古之宏規位望冠於
百僚利澤施於四海躬承世祖肇隆中統之丕圖子侍
裕皇復贊元貞之初政方倚具瞻之重宜昭先德之華
維垣進秩於上台列爵仍疏於大國錫號著勳庸之偉
易名申節惠之文殊恩允出於朕心卹典非由於汝請
表南宮雲臺之像旣彰異渥於宗臣措天下泰山之安
抑助貞勤於上宰尙服休命永播英聲可特贈宣忠保
德佐理功臣太師開府儀同三司中書右丞相追封秦

益國公諡忠獻

文類十一

丞相和禮霍孫贈諡制

北方閒氣實生命世之材黃閣清風蓋出登瀛之選慨
 英靈之已往當卹典之崇頒故光祿大夫中書右丞相
 和理霍孫派接元勳慶鍾全德早躡鼇峰之首誕披雲
 漢之章開闢賢關為司徒而敷五教更張化瑟位冢宰
 以總百官恢揚累世之洪休新美至元之大政掄才如
 崔祐甫之廣潔已有張忠定之剛著績熙朝既闡文明
 之治疏封列國宜居禮義之鄉可贈保德協謀佐理功
 臣太師開府儀同三司追封齊魯國公諡文忠

瓶城齋銘

為淮東憲司知事凌德庸作

利慾之兵或隳吾城躁厲之機或發吾瓶墨其守不若
 修仁義之干櫓金其緘不若駕聖賢之說鈴若然則城
 何懼於脫肩瓶何患乎建瓴哉

文類十一

曲阜孔子廟碑

聖上嗣服之初祇述祖考之成訓興學養士嚴祀先聖
自曲阜始制詔曰孔子之道垂憲萬世有國家者所常
崇奉中外聞之咸曰大哉王言拭目太平文明之治粵
明年元貞改元先聖五十三代孫密州尹治入朝璽書
錫命中議大夫襲封衍聖公月俸百千秩視四品孔氏
世爵弗傳者久至是乃復申命有司制考辟雍作廟於
京師由是四方嚮風崇建廟學惟恐居後闕里祠宇燬
於金季之亂閣號奎文若大中門闕存者無幾右轄嚴
公忠濟保魯嘗假清臺頌_麻錢佐營繕之費歲戊申始
復鄆國後寢以寓先聖顏孟十哲像至元丁卯衍聖公
治尹曲阜主祀事將圖起廢奎文杏壇齋廳費舍卽其
舊而新之禮殿則未遑也國初封建宗室畫濟兗單三
州爲魯國大長公主駙馬濟_甯王分地置濟_甯總管府